peine, et affection et compassion de monsieur de Mandelot Gouverneur en ladite ville, et d'autres chef et gentilshommes est grandement à noter, qui oublians (par manière de dire) le rang et degré qu'ils tenoyent, espris de tres grande pitié, sans crainte d'aucun peril ny danger, tourment ny fascherie, sauuans de l'impétuosité de l'eau indifféremment ce qui leur estiot possible, donnoyent vn merueilleux exemple à tout le peuple de leur magnanimité et d'vne humanité tres remarquable. Les voir dans l'eau par dessus les sangles des cheuaux, mouillez et harrassez, auec vne merueilleuse peine, sauuer femmes et petits enfans, et ce le plus doucement qui leur estoit possible, n'estoit-ce signe de grand courage? Les voir lamenter, plaindre, aider et secourir ceux que desia l'eau tenoyt enfermez et enclos, et n'espargner chose qui fut en leur puisssnce : n'est-ce chose digne de louange? Plusieurs grans personnages et braues chefs, iadis ont acquis quelque renom, pour auoir déliuré leurs villes d'extrême danger : mais au iugement d'vn chacun, à plus grande occasion, sera celebree la mémoire dudit Sieur de Mandelot, pour le singulier deuoir où il s'est employé: mais estant trop foible d'esprit pour traiter ceste matière, la laissant à quelque autre, ie continueray, qu'onques ne fut veue pareille misére et pitié, oncques ouy pareil desastre et degast : oncques leuë calamité tant piteuse et deplorable : bref impetuosité d'eaux si véhémente. Ie m'efforcerois de dire ici les causes et raisons du desbordement, pour compler aux cureux; mais dautant qu'elles sont incertaines et difficiles à iuger, pour la varieté des opinions, ie les laisseray au iugement d'vn chacun : si est-ce qu'vne infinité de maisons abbastues : plusieurs villages tous entiers ruinez: vn grand nombre d'arbres desracinez: quelques ponts rompus et emportez : force bestail noyé? et (qui pis est) beaucoup de personnes submergees, déclarent, ce me semble, vn extrême courroux et iugement de Dieu. Cependant le Rosne continuant touiours son impetuosité, et d'heure en heure s'augmentant, deploya si asprement sa furie, que